



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 7

Yangia anidakangma :



Tir Yimiyim



tir\_yimiyim



tir yimiyim

TAPAK 3



**Rara tuluba akumer, Iran-i Saudi Arabia nung US Embassy amak**

**India ano rara ka atema renemdar: Pakistan tir**

VOL. XXIII ISSUE NO. 140 (ADOK 140) DIMAPUR RASEMNÜ (WEDNESDAY) METSÜREMI (MARCH) 04, 2026 ₹ 5.00

## NGTA tesayurtemi lungkak aitiba anena atar NLA Select Committee-i 'Vande Mataram' asadangtsü

**Kohima, March 3, 2026 (TYO):** 2010 aser 2013 Nagaland Government Teachers Association (NGTA) tesayurtemi Mongulbarnü lungkak aitiba anena atatsü lemtetogo.

Parnoki anogo pezü tashi Directorate of School Education kima nung lungkak aitiba arur Nagaland Students' Federation (NSF) aser Eastern Nagaland Students' Federation (ENSF) tiyongtsü aitiba ajanga lungkak aitiba anena atar.

Tesayur 2,293-i February 26 nung lungkak aitiba mezüngbuba shilem tenzüka liasü. Parnoki parnok itasen Centrally Sponsored Scheme nungi State non-plan head kübok belentsü akhanger.

Department of School Education-i mapang kar nung itasen agütsütsü menubaji parnok RMSA appointees asüba agi lir kechiyong Centre sorkari senotsü magütsüra itasen magütsüteter ta osang jangjatsüogo.

Tesayurtemi masü saka sorkari dang salary head atema telemtetba agir ta DoSE-isa metetdaksüogo.

Tesayurtemi tanü agi anogo pezüba lungkak aitiba anena atar ta paisa ashi.

asfer ENSF-i parnok den ajuruteper aser sorkar den iba onük lemsateptsü nangzüka liasü. Parnokisa tesayurtemi dang kaketshirtem asoshi bilema pei pei classroom-i meypa aotsü mepishia liasü.

"Anogo pezüba lungkak aitiba dang kaketshirtem lennirtemi olemtep aser idangji lungkak aitiba anentsü aser classroom mapa tenzüksü mepishi. Parnokisa iba onük tejakleni bener aotsü nangzüka liasü" ta NGTADimapur Unit president Alemkala-i ashi.

"Ozü kaketshirtem asoshi bilemja aser parnok nem takoksa mengudaktsütsü atema onoki lungkak aitiba anena atar" ta laisa ashi.

"Tesayurtemi NSF aser ENSF tsüngdang takhangba onük asem benokogo. State non-plan head kübok itasen dendaktsütsü, April 2026 nungi mapa tenzüksü aser ketdangpurtem dang nungi tezuluba nung tenangzüka agitsü shiogo" ta NGTA 2010 & 2013 Central president Peihau Irangbe-i ashi.

NSF aser ENSF ajanga tesayurtem asoshi temeten bentsür arutsü ta teimla nung lungkak aitiba anena atar ta paisa ashi.

## Nisung tepseter ka taküm piyong tepuokdak ayutsü

**Dimapur, March 3, 2026 (TYO):** 2020 küm Dimapur nung tanur tetsür ka tepsetba ken o nung tai tongloksür Yilobemo Mzhui taküm piyong tepuokdak ayutsü obendang nguogo.

Mozhui-i arishi küm 17 tain tetsür ka tepsetba atema Fast Track Special Court (POCSO), Dimapur-i pa taküm piyong tepuokdak ayutsü temerenshi agütsü.

Tetsürla indang mang ya St. Clare Higher Secondary School, Kachari Gaon (Phevima) nung anu.

Iba tatalokba atema Women Police Station, Dimapur nung ken o benoka liasü aser DCP Zone II Smti Aotula T. Imchen, IPS lenisüba kübok taoba ACP Ketoukhrielle Metha, NPS-i Investigating Officer ama inyak. Dimapur Police-i jungiunga

bushisüngdang, tebang, documentary aser forensic kulitem bendena liasü.

IPC aser POCSO Act kübok arlla balala kübok bushisüngdanga arur okadak chargesheet ka agütsü. Talisa Special Public Prosecutor Imlimongla-i anir okatsürtemi tai tonglokja alisangi ozüng alema inyakba kulitem agütsü.

Ken o ajanga angadanga aruba sülen Special Judge Kheshele Chishi-i tai tonglokja alisangi nisung tepsetogo ta kulitem agizük aser March 2, 2026 nü pa taküm piyong tepuokdak ayutsü temerenshi agütsü.

Iba atema Dimapur Police-i taoba Investigating Officer, ACP Dimapur aser Women PS Dimapur nem tenüngsang agütsüogo.

## Nagaland Assembly-i NE nung amakba aitsür

**Kohima, March 3, 2026 (TYO):** Nagaland Assembly-i Mongulbarnü Northeast nung mezüngmeshiba aser amakba tatalokbatem aitsüogo.

State Assembly nung Vande Mataram atentsüba atema tebilemstütem benoka lemsatepdang iba taitsüba ola metetdaksüogo.

MLA aser NPF Secretary General Achumbemo Kikon-i tawa India kübok tesem balala nung Northeast nung dak tenük yoka inyakshiba atema ken o benok.

Delhi nung Arunachali tsür asem mezüngmeshiba aser All India Institute of Medical

Sciences (AIIMS), Gorakhpur nung Nagaland nungi tetsür doctor ka dak tim masüba mapa inyakba atema Achumbemo Kikon-i benoka jembu.

Idangji Chief Minister Neiphu Rio-i India yimtem nung Nagaland dena Northeast nung amakba aser mezüngmeshiba ya kanga tim masü aser magizüker ta metetdaksü.

Ibala inyakyim ya Constitution nung telongiem aser ajak kasa ta lateta aliba tangatetba anema lir. Linük ajungalen Nagaland nung külem senso ama züngshitsüla aser akhümtsübula ta CM Rio-i ashi.

**Kohima, March 3, 2026 (TYO):** Ministry of Home Affairs (MHA)-i national song 'Vande Mataram' atentsü/atemtsü indang tetuyuba agütsüba asadangtsü atema Nagaland Legislative Assembly (NLA)-i Select Committee ka nem mapa lemsütsüogo.

Tanü assembly nung party balala nungi MLA temi Governor's Address atema Motion of Thanks mapang National Anthem jakdang Vande Mataram atentsü/atemtsü tetuyuba agütsüba asoshi tebilemstü onük balala lemsatepa liasü.

Iba sülen NLA Speaker Sharingain Longkumer-i Select Committee ka nem iba onük asadanga repringtsü atema lemtetba metetdaksü.

MHA-i January 28 nü iba tetuyuba agütsü aser Homban nungi Budget Session 2026-27 tenzükdang Assembly nung tang mezüng atema national song Vande Mataram atem.

Chief Minister Neiphu Rio-i züngsemtemi ashibaji shitak ta ashi. "India nüjiso bushiba nung iba ken ya tongtipang lir ajisüaka January 28 nü executive order ka ajanga national song atemtsü tetuyuba agütsü" ta pai ashi.

Nagaland ya Article 371A kübok kümzüka lir aser political agreement ka ajanga akümba state ka asü nung kümzüka ayutsü onük balaka kar lateta lir. Anungji Nagaland nung iba tetuyuba ya mapa küma inyaktsü

asü masü ta asadangtsü atema Assembly nung Select Committee ka nem mapa nungloksütsü junger ta CM Rio-isa metetdaksü.

BJP dak alaka tanünga party balala nungi MLA temi iba tetuyuba atema ashishitepa jembitep.

Bankim Chandra Chattopadhyay-i mejemba Vande Mataram ya putiotsü aser linük asoshi tongtipang lir ajisüaka national symbols mesüra songs dak sendakba tetuyubatem ya kanga junga asadangtsüla ta MLA temi ashi.

Zero Hour mapang MLA Achumbemo Kikon-i session tenzükdang National Anthem jakdang Vande Mataram atem ashishitepa liasü.

"Vande Mataram ya Hindu nung külemküjaba den sendaktep lir. Khristantem ama asenoki Tsüngrem ka dak dang amanger. Asenoki kibur ana metenzüktsütsü" ta NPF MLA Kuzholuzo Nienu-ia ashi.

"Asenoki iba ya memelatsüla. Hindu nung külemadang atemba ta bilemba ka züngdaksüadang mesüra angadaksüadang onok kanga aoksa. Iba ya asenok ajak atema tasen aser mezüng ajangshiba lir. Asenoki National Anthem tena arur anungji Vande Mataram azüngtsü nungdak madoker" ta paisa ashi.

"Iba ken ya Hindu nung tsüngremtem dak rangloker aser secular linük ka nung iba ama ozüng benokba ya tim masü aser Article 371A alema lir, kechiyong

iba ajanga Naga nung tamangba aser loktiliba inyakshangshi kümzüka ayur" ta Nienu-isa ashi.

Iba onük atema NPF MLA tem- P. Longon aser T.N. Manen, RPI (Athawale) MLA Lima Onen Chang, NPP MLA Dr. Tseilhouuo Rhuso, JD(U) MLA Jwenga Seb aser Independent MLA Dr. Neisatuo Mero nungeria tebilemba lemsatepa liasü.

"Asenok ajak pei pei tangatetba lir saka national constituent body ajanga national song ya agizük aser asenoki ibaji angatetsüla" ta BJP Minister Temjen Imna Along-i ashi.

India nung nütsüng yongsük crore 125 lir aser Hindu nung crore 100 tema lir. Nisung kari metenyonga iba ajanga nütsüng yongsük teimba indang tangatetba sayur, ta pai ashi.

"Metentsü atema masü saka asenoki linük nung tanüngbapur tangatetba akhümtsübuttsüla. Hindu kaketshirtemi school nung Lord's Prayer, 'Our Father' asenok den külemi azünger" ta Along-isa ashi.

Iba onük ya kija indang ama magizüktsüla mesüra Article 371A alema ya mezüngshitsüla ta paisa shisem.

Tatem nung Speaker Sharingain Longkumer-i iba onük Select Committee dangi abentsü oshidang agütsü aser Assembly Secretary dang Parliamentary Affairs Minister nem osang sangoktsütsü tetuyuba agütsü.

## Tan Assembly session nung FNTA Bill benoktsü: CM Rio

**Kohima, March 3, 2026 (TYO):** Nagaland sorkari iba session nung Frontier Nagaland Territorial Authority (FNTA) Bill benoktsü aser kasa session nungsa agizüktsü imlar ta Chief Minister Neiphu Rio-i ashi.

Mongulbarnü Governor's Address atema olemtep tembangdang FNTA Bill nung February 5, 2026 nü India sorkar, State sorkar aser Eastern Nagaland Peoples' Organization (ENPO) tsüngda sign asüba Memorandum of Agreement (MoA) nung keta aliba onüktem adentsü ta CM Rio-i ashi.

Iba MoA nung Eastern Nagaland nung alirtem taginübatem keta lir aser kasa mapang Nagaland state taginübatem kümzüka ayur ta pai ashi.

Iba tenangzüktep nung

Nagaland melemsatsü, State mesüra Union Territory balaka maotsü, Sixth Schedule jenjang malitsü aser Article 371A meyanglushitsü lateta lir ta CM Rio-isa shisem.

ENPO-i akhangba ama FNTA area madak Governor-i tebilemstü khuret abentsü, ajisüaka Nagaland state sasep nung dang legislative, executive aser financial autonomy alitsü ta paisa metetdaksü.

FNTA ajanga Indo-Naga yimtenren olemtep nung tetsükdaksü kecha malitsü ta Rio-isa ashi.

India sorkar aser Naga political groups tsüngda Naga yimten olemtep dar aser state sorkari 'active facilitator' ka ama maneni shilem agir ta paisa ashi.

February 5 nü Nagaland nungi teshimtet telok kati Union Home Minister den ajuruteper aser

idangji September 12, 2024 nü senden amendang onük pezü bangzüngtepba indang nenshia liasü. Iba senden nung telok 61 aden aser nisung 226-i sign asü ta CM Rio-i ashi.

Iba bangzüng ajanga Centre dang interlocutor ka shima political mesüra ministerial level nung yimjung olemtep ajungkettsü ayongzüker ta paisa ashi.

Union Home Minister-ia telangzüba tajung agütsü aser political level atema Minister of State for Home Affairs ka den tongti ketdangsur ka shimtsü ta shiogo.

Chief Minister Rio-isa 2027 Census exercise kanga junga agitsü indang ashi aser March 11, 2026 nü MLA tem aser party lennirtem asoshi briefing session ka alitsü metetdaksü.

## Kohima nung mezüngbuba District Electricity Committee senden amen



Kohima nung mezüngbuba District Electricity Committee senden nung tangokba noksa angur.

**Dimapur, Metsüremi/March 03 (TYO):** District Electricity Committee (DEC) to Revamped Distribution Sector Scheme (RDSS) indang mezüngbuba senden March 3, 2026 nü Deputy Commissioner, Kohima indang Conference Hall nung mena liasü.

DEC mendenpuba aser MP, Lok Sabha, S. Supongmeren Jamir-i smart meters indang tajanzük aser pei atsükba bill shidak adokba indang awareness nüburtem nem agütsüsü tongtipang ta ashi aser department dang nüburtemi system tajungba nung angatettsü asoshi conventional meters nungi smart meters dangi melenba tajanzük lemsateptsü ayongzüka liasü.

State nung RDSS mapa kuma inyakba indang züngsemtem nem osang agütsüba atema MP-i pelaba lemsatep aser district balala nung electrification status osang meshi aser Kohima district nung 'un electrified' aser 'partially electrified' indang kuli meshia liasü, kong nisung aliba tesem 27 tang tashi un electrified nung lir aser 14 partially electrified nung lir.

District nung kanga keraa yim tasen aika akumba ajanga timtem ajuru ta ashi. Kohima district nung yamaji lira, danga district tem nunga iba mesük tensa alitsü ta pai ashi aser department dang kanga junga asadangtsü shia liasü.

Deputy Commissioner, Kohima, B. Henok Buchem-i

smart metering aser rooftop solar inyakyim onük süok aser department dang item inyakyim nungi tajanzük anguba indang nüburtem den lemsateptsü shia liasü.

District nung iba scheme tajungtiba nung mapa kuma inyaka aotsü mechi departments aser stakeholders tem amalitep akatsü nüngdakba pai shia liasü.

Additional Chief Engineer, Power Department, Er. Lobosang Jamir-i RDSS indang tongmelang agi lemsatepdang, power agütsüba aser consumer nungi revenue aruba tetsünga malitsüla, saka state nung aji akoktsü tebilemetsü tulu lir, ta ashi.

Ajisüaka RDSS kübok smart metering mapa kuma inyaka iba tebilemetsü bentettsü meranger.

Power distribution sector nung tajungba nung inyaksangshitsü aser senotsü tashi ita alitsü atema Ministry of Power, Government of India ajanga RDSS ya July 2021 nung tenzük, ta pai metetdaksü.

Iba scheme kübok distribution infrastructure tashi itshitsü atema senotsü teyari agütsür.

State nung power sector temelenshi alitsü atema Chief Secretary, Nagaland mendenpuba sür January 31, 2022 nung State Level Distribution Reforms Committee (DRC) tentet, ta Er. Lobosang-i ashi.

RDSS aser danga power sector schemes achayangtsü atema Government of India-i

tuyuba ama district level nung District Electricity Committees ya July 14, 2022 nung tenzük.

Tang state nung Aggregate Technical and Commercial (AT&C) losses ya 43.93 (FY 2024-25) nung lir aser iba tebilemetsü bentettsü artema state tesem ajunga nung smart metering ya tenzük, ta pai ashi.

Total target meters 3,23,878 nungi tang tashinung smart meters 37,081 inokogo aser yangji consumer meters 36,249, distribution transformer meters 667 aser feeder meters 165 alitsü, ta pai metetdaksü.

Scheme kübok takoksa ajemdaksütsü mapatem nung overloading ajemdaksütsü atema distribution transformers tasen inokba, bare low tension conductors melen aerial bundled cables inokba, aser high tension conductors tejentem melenba dena lir.

Nüburtemi memulungba mechi smart meters inokba nung department timtem ajurur, ta Er. Jamir-i ashi.

Smart metering nükjidong aser tajanzük nüburtem nem angatetdaksütsü nüngdaker aser iba scheme takok ngua inyaka power distribution system tajungba kumdaksütsü atema nüburtemi amalitep akatsüla, ta pai ashi.

Dimapur aser Peren densema district kar nung loss reduction works tenzük lir aser Nagaland nung smart metering indang awareness agütsütsü atema department-i "Smart Meter Pakhwada" tenzükogo," ta paisa metetdaksü.

## Dimapur DC-i Juvenile Justice Act shidak amshitsü tuyur

**Dimapur, Metsüremi/March 03 (TYO):** Deputy Commissioner, Dimapur, Dr. Tinojongshi Chang, NCS-i adoption dak sendakba nung Juvenile Justice (Care & Protection of Children) Act, 2015 indang Section 80 aser 81 shidak amshitsü totuyuba agütsüogo.

Tesem balala nung iba Act kübok adoption atema ozüng yanglua aliba shidak mamshiba osangtem lir, ta totuyuba nung shia lir.

Juvenile Justice (Care & Protection of Children) Act, 2015 aser Adoption Regulations nung shia aliba ama mesüra tanur shinga adoption atema

magütsütsüla, ta ashi.

Iba Act indang Section 80 kübok adoption procedures nung aibelener tem tepuokdak küm asem tashi ayutsü aser senchi sen 1,00,000 tashi achitsü shia lir. Ano Section 81 nung 'illegal adoption' densema nükjidong mashi atema tanur ayokba aser aliba atema ozüng kübok merenshitsü shia lir.

Iba dak sendakba nung mozüki, nursing homes, clinics, maternity centres, Child Care Institutions (CCIs), NGOs aser sendaktepa aliba establishments ajunga dang Act aser Central Adoption Resource Authority (CARA) ajanga agütsüba Adoption Regulations nung shia

aliba shidak meinyaki tanur shinga adoption atema magütsütsü, memeshitsü mesüra iba ama inyakyim nung meyariteptsü metetdaksür, ta ashi.

Kija, medical practitioner, staff züngsem mesüra institution kechaia indang-indanga mesüra kar ajanga süaka, ozüng agi melaba alema oa adoption atema jembishinü masütsü mesüra meyariteptsüla, ta DC Dimapur-i ashi.

Maneni, tanur ka anepalutsü aser kumzüka ayutsü nüngdaka lira, tekeraba nung Child Welfare Committee nem osang agüja ozüng agi mela aliba ama inyaksüla, ta ashi.

## Nagaland Angh-i Holi benjong salem lemsatep

**Dimapur, Metsüremi/March 03 (TYO):** Kü adianu aser adianutsür ajunga dangi tepela Holi benjongmung salem abener. Holi ya temenen madak tajung agi takok anguba temaitsü ka lir aser tepela, putepa külemi aliba tanüla benjongba lir, ta Nagaland Angh Ajay Kumar Bhalla-i sangdong ka nung ashi.

Iba benjong nung sentsü

balala amshiba ajanga kin balala indang tebour tajung sayur aser kin ajunga tsünga telungjem akangshitsü tongtipang ta sayur.

Iba sentsü benjong ajanga ki shia tepela, tesunep aser yimchiyimjung lidakjangma. Iba benjongmung ajanga asenoki temeim, kati ka akumtsüboa aser tajung bilema külemi asen state terenlok asoshi inyaksü imlar, ta Nagaland Angh-isa ashi.

## NCERT-i Grade 8 atema adokba SS textbook mamshitsü

**Dimapur, Metsüremi/March 03 (TYO):** Ministry of Education, Government of India ajanga sangdongba aser Supreme Court of India-i tuyuba ama Nagaland nung aliba Heads of all Schools (Govt. & Private), Book Sellers (Wholesaler /Retailer) aser Library- in-Charges ajunga dang National Council of Educational Research and Training (NCERT) ajanga February, 2026 nung "Exploring

Society: India and Beyond" nungja agütsür Grade 8 (Part 2) atema Social Science Textbook, First Edition (Book) adoka hard mesüra soft form nung tang lemshia aliba, storage, retail outlets mesüra educational institutions nung aliba densema soita ayur aser nüburtem nem mamshidaksütsü metetdaksür, ta Directorate of School Education ajanga sangdong ka nung metetdaksü.

## Dimapur Police-i interview/viva-voce mapang melenshir

**Dimapur, Metsüremi/March 03 (TYO):** Dimapur Police Commissionerate kübok constable shimtsü atema interview/viva-voce agütsü aliba administrative mepaidoktetba ajungben maparen kar aliba mechi mapang melenshir, ta Office of the Commissioner of Police, Dimapur ajanga sangdong ka nung metetdaksü.

Commissioner of Police, Dimapur ajanga sangdong ka agütsüba nung, February 27, 2026 nü sangdong agütsüba nung interview/viva-voce atema anogo shimteta aliba tera melenshir, ta ashi.

Interviews ya Office of the Commissioner of Police, Dimapur

nung agütsü.

Tang mapang melenshiba nung candidates tem anogoshia batches ana-na lemsatsü. Mezüng batch ya anepdang 9:00 ako nungi CP Office Conference Hall nung agütsü aser tanabuba batch ka kasa tesem nung anüngdang 12:00 ako nungi agütsü.

Interviews ya March 9, 10 & 11, 2026 anogotem agütsü aser batch shia roll numbers aser anogo ya metetdaksüogo.

Interview/viva-voce agütsü atema taoba mapang totuyuba agüja aliba kasa alitsü, anungji candidates temi mapang melenshiba ama arutsü metetdaksür, ta sangdong ajangasa ashi.

## DC Chümoukedima-i coaching centres registration atema metetdaksür

**Dimapur, Metsüremi/March 03 (TYO):** Chümoukedima district kübok aliba coaching centres ajunga registration agütsü asoshi Deputy Commissioner, Chümoukedima ajanga metetdaksüogo.

Iba totuyuba ya Government of Nagaland sangdong aser "Guidelines for Registration and Regulation of Coaching Centres in the State of Nagaland, 2025" nung aliba ama March 3, 2026 nü sangdonga liasü.

District nung aliba coaching centres ajunga March 31, 2026 tashinung registration atema apply asütsüla. Kaketshir tejangraba wazüka ayutsü aser private coaching institutes inyakyim azüoktsü atema iba

mera ya agir.

Study programmes mesüra competitive examinations atema kaketshir 20 dak tema nem tuition, instruction mesüra academi guidance agütsüba establishment ajunga register asütsüla, ta ashi.

Coaching centres branches balala lapoka alibatam registration atema centres balala ama züngshitsü. Ajisüaka counselling, sports, dance, theatre aser danga creative activities atema lapoka aliba institutions tem madentsü.

Application ya DC Chümoukedima indang office nung Development Branch nem agütsütsüla, ta sangdong ajangasa ashi.

## NBHM aser ICICI Foundation tsünga MoU zülutep

**Dimapur, Metsüremi/March 03 (TYO):** Yimdak yimtsüng nung terenlok maparen nung yaritsü atema Nagaland Bee Keeping & Honey Mission, Nagaland aser ICICI Foundation tsünga Memorandum of Understanding (MoU) ka Nagaland Bee Keeping & Honey Mission, Chümoukedima nung February

28, 2026 nü zülutepogo.

Sentiwapang Aier, Secretary to Chief Minister and Team Leader NBHM, aser Pungouthing Tunzalion, Zonal Head ICICI Foundation; Remei Diphung, Development Officer ICICI Foundation aser Rajkumar Bartha, Branch Manager, Purana Bazaar Branch nungertem lia iba MoU ya zülutepa liasü.



Air India flight AI916D indang passenger aser crew tem Dubai nungi Indira Gandhi International Airport, New Delhi tonga aruba noksa nung angur. Air India-i ashiba agi, Middle East nung mepetmsü adoker aliba mapang India indang tayimtsü ka linük yimtiba tonogo.

### MHA-i CAA citizenship application atema panel ana amenokogo

**New Delhi, Metsüremi/ March 3 (Agencies):** Union Home Ministry-i West Bengal nung Citizenship Amendment Act kübok India lisapur jenjang aginüa asüngdangertem ken o asadangtsü atema ano empowered committee ana amenoktsüogo.

State nung iba amala committee ana amenoker liasü. Ajisüaka applications aika aruba ajanga ano panel talila ana amenoktsü atema telemetba agia liasü, ta kettangsurtemi ashi.

Iba committee ana ya India sorkar kübok Deputy Secretary aser iba tema aliba kettangsurtem tekolak ser inyaksangshitsü, koba Registrar General and Census Commissioner of India-i nominate asütsü.

Ministry-i ashiba agi, empowered committee nung ya Subsidiary Intelligence Bureau nungi Under Secretary aser iba tema aliba kettangser ka, jurisdictional Foreigners Regional Registration Officer-i nominate asüba Under Secretary tema aliba kettangser ka aser State Informatics Officer of the National Informatics Centre of West Bengal-i nominate asüba Under Secretary aser iba tema aliba kettangsur ka densema alitsü

Committee nungsa West Bengal indang Post Master General mesüra Post Master General-i nominate asüba postal officer ka alitsü aser iba kettangsur indang rank ya India sorkar kübok Under Secretary tekübok alir ka masütsüla.

Kasa sangdong ajanga ashiba agi, committee nung invitee ana alitsü; ka West Bengal sorkar kübok office of the Principal Secretary mesüra Additional Chief Secretary aser jurisdictional Divisional Railway Manager of Railways representative ka asütsü.

March 11, 2024 nü sangdongba ama Citizenship Act kübok committee ya Director tekolakser inyaksangshitsü aser pa kübok züngsem tenet alitsü.

Centre-i Citizenship Act, 2019 ya 2024 küm March 11 nü benok. Iba ya Pakistan, Bangladesh aser Afghanistan nungi 2014 küm December 31 masü tsünga arua aliba Muslim nunger masürtem nem lisapur jenjang agütsütsü atema benokba lir.

### Iran rara: India-i azüzüktepba inyaksangshitsü mepeshi

**New Delhi, Metsüremi/ March 3 (Agencies):** Iran aser Gulf region nung rara tamajungba küma aoba mapang India-i maneni sensaksem ajanga keno bentettsü aser civilian tem tepsetba nokdangtsü ayongzükogo.

Ministry of External Affairs (MEA)-i ashiba agi, tawa Iran aser Gulf region nung tensa mejungu küma aoba New Delhi-i kanga süiki ia agir, aser ajak dang azüzüktepba inyaksangshitsü, rara tamajungba küma meyoktsü aser nüburtem kümzüka toktsütsü atema tongtibatanga jenjang agitsü ayongzükogo.

Ministry-isa, tang tensa mejungu aliba azüoktsü aser ken o kechi mebenteti ali aji bentettsü atema senksemsüla

ta ashiba den state ajak indang sovereignty aser litsü ya akümtsübuttsüla, ta ashi.

United States aser Israel nati Iran amakba sülen Middle East nung mepetmesü tulu adoker aliba mapang tang MEA-i iba olen lemsatepogo.


Iba mepetmsü ajanga India dak kongshiba MEA-i angateter aser talisa iba tesem nung aliba lisapurtem tekümzüka kübok toktsütsü atema tebilemstü lir. Rara agi kongshir aliba linüktem nung India mission-i lisapurtem den tongtepratepdar aser tetuyuba balala agütsüba den teyari balala agütsüdar.

New Delhi-isa, iba ajanga rongsenketzüng nung kongshiba indang lemsatepogo. India atema crude oil aser liquefied natural gas ya aika

Gulf aser Strait of Hormuz ajanga bener arur aser iba ajanga iba tesem ya süngjema alitsüji kanga tongtibatanga akümer. MEA-isa, shipping lanes mesüra commercial logistics nung minprongba ajanga rongsenketzüng dak kongshitsü, ta ashi.

MEA-i, India-i shishilembartem rong amakba ya aitsür ta ashiba den India nunger kara tawa tepsetogo aser kar samar bushidar, ta shisem.

India nunger crore ka shi Gulf linüktem nung mapang inyaker aser item linüktem nung India nunger ya bendanger lokti tulutiba lir. Parnok kümzüka toktsütsüji sorkar mapa tongtibatanga ka lir, ta kasa sangdong ajangasa metetdaktü.



Iran lenir Ayatollah Ali Khamenei tepsetba anema longkak aita mepetmesü adokba sülen Jammu and Kashmir kübok Sopore nung tenokdangba tesashi agütsür lir aser sepaitemi kanga junga meita atadar.

### BJP-i Rajya Sabha nominee tem tenüng sangdongogo

**New Delhi, Metsüremi/ March 3 (Agencies):** Bharatiya Janata Party (BJP)-i Mongolbarnü Rajya Sabha atema 2026 biennial election asoshi candidate tem sangdongogo, kong Bihar, Assam, Chhattisgarh, Haryana, Odisha aser West Bengal nungi nominee tem densema lir.

New Delhi nung central office nungi sangdong ka ajanga ashiba agi, central election committee-i March 16 nü taruba election atema tenüngtem agizükogo.

Bihar nungi BJP-i Nitin Nabin aser Shivesh Kumar na nominate süogo. Nabin ya January 20 nü BJP indang national tir aküm.

Nabin ya Bihar nung ajaki jangja aliba nisung ka aser pai taoba mapang state sorkar kübok tongtibatanga mapatem benogo aser pa centre nung party lenirtem den kanga junga sendaktepa lir.

Bihar nungisa Shivesh Kumar ya party asoshi tongtibatanga nisung ka ama

züngshir, aser pa state-level party inyakyim nung tajangshiba aika bena aliba nisung ka lir.

Assam nung BJP-i Terash Gowalla aser Jogen Mohan na nominate süogo. Tenaprongla ya Northeast nung party atsülanga aoba nung tongtibatanga shilem agir kaka lir.


Chhattisgarh nungi Laxmi Verma shimogo aser Haryana nung Sanjay Bhatia toktepba angutsü.

Odisha atema party-i Manmohan Samal aser Sujeet Kumar na nominate süogo. West Bengal nung Rahul Sinha ya Upper House atema BJP indang candidate asütsü sangdongogo.

Rajya Sabha biennial elections ya term agi tonger anenba züngsemtem menden melentsü atema agir, aser iba election nung state assembly tem nung legislators temi vote agüja candidate tem shimer.

State kar nungbo BJP puri ayong ayonga akoktsü, saka state kar nungbo cross-voting asütsü akok.

### India ano rara ka atema renemdar: Pakistan tir



**New Delhi, Metsüremi/ March 3 (Agencies):** Kiralongrartemi Pahalgam maka India o Pakistan na mangatettep adokba sülen ita ishika lir Pakistan tir Asif Ali Zardari-i, New Delhi ano rara ka atema renemdar ta ashi.

Parliament nung o jembiba mapang Pakistan nunger lenir yagi ashiba agi, India ano Islamabad den rara ka atema renemdar. Iba olen lemsatepba sülen Zardari-i New Delhi den yimjung nung sensak asemstü ayongzüka liasü.

"Ni India dang rara nungi pilar sensaksemstü ajungshir," pai Parliament joint sitting ka nung ashi.

Pai jembiba o ya social media nung ayimsünga prokshio.

India-i 'Operation Sindoor' benoka Pakistan aser Pakistan-occupied Kashmir nung kiralongrartem amendaka aliba tesem amakba sülen India aser Pakistan na 2025 küm May ita anogo pezü tashi raratepa liasü.

Pakistan military-ia drone amshia India amak tenzük aser iba yongji India-i Line of Control aser international arrtsü nung blackout ka benoka liasü.

April 22 nü kiralongrartemi Pahalgam amakba sülen India-i Operation Sindoor benok. Iba tesem amakba atema India-i Pakistan nung amendaker aliba LeT nungi jakzüka Resistant Front dak tai tongloktüsügo. Iba lendong nung alima penzüür 26 asü. India den külemi ano Pakistan tir-i Afghanistan dang yimjung asoshi sensaksemstü ayongzükogo.

Arab News sandong ka ajanga ashiba agi, Zardari maneni India indang proxy ama inyaksangshiba atema Afghanistan aitsüogo.

India-i parnok Afghanistan inyakyim nung kecha shilem mali ta shia arudar. 2025 küm raratepba mapang Pakistan-i India aitsüba Ministry of External Affairs-i magizük.

Taoba ita nungi asendenshir Afghanistan amaka tenzükba sülen temeshi ita Ramadan mapang Kabul amakba atema Pakistan aitsüogo.

"Temeshi ita Ramadan mapang Afghanistan maka tetsür aser tanur densema civilian aika tepsetba atema India-i Pakistan aitsür," ta MEA otongdar Randhir Jaiswal-i ashi.

### - ALI AYOKER -

\* Prime land for Urgent Sale ! \* Naga united village  
\* 70,000 sq. ft. \* Plain stable high land  
With concrete boundary walls and natural drainage.  
\* Near the main road \* Any plot size available  
@ 430/- sq. ft (Negotiable & No broker)  
Contact : 7628822085 / 9366156425



# TIR YIMYIM

## YIMOBILEM (EDITRIAL)

DIMAPUR WEDNESDAY, FEBRUARY (METSUREMI) 04, 2026

### Himanta-isa CM inyaktsü asü?

- P Tiamongba Aier

**A**ssam nung tang Chief Minister Himanta Biswa Sarma-i aniba BJP sorkar kümsük May 2, 2026 nü tembangtsü aser iba jagi taküm March-April ita tsüngda Assam Legislative Assembly elections agitsü sentong lir. Tang tesüsabuba Vote Vibe survey nung NDA-i 33.4%, INDIA Bloc 30.9%, AIUDF 4.0% aser tangartem 8.3% votes angutsü ta bushitetba metetdaksüogo. Assam nung arishi küm 18 nungi 24 tashi lanur 22% ajanga NDA aser 28 ajanga INDIA Bloc pusemer ta Vote Vibe survey ajanga ashir. Ajisüaka, arishi küm 55 temapur 54% ajanga NDA aser 32% ajanga INDIA Bloc pusemer ta parnokisa ashir. Maneni SC, ST, OBC aser General voters 43% nungi 47% tashi NDA aser Minority voters 40% nungi 45% tashi kati INDIA Bloc pusemer. Tatemsa Chief Minister atema Himanta Biswa Sarma pusemer 48.2% aser Gaurav Gogoi pusemer 42.0% lir ta survey agiba osang metetdaksüogo. Assam nung survey balala nung NDA jenjang tajungba asüba ya voters nem tajanzük agütsüba policy tem yanglua inyakba ajanga lir. Orunodoi cash assistance, student stipends, vulnerable groups nem pensions aser süngolu nung inyaker nem state sorkari senotsü teyari agütsüba ajanga Assam nung nisung aikati NDA pusemer. Tawa Assam state sorkari Mission Basundhara kübok lisopurtem, aluyimertem aser süngolu nung inyaker kin balala nem land titles agütsüba ajanga NDA-i voters atsür aruogo. Ano, 2021-22 nungi Chief Minister Himanta Biswa Sarma lenisüba kübok Gross State Domestic Product (GSDP) Rs 4.10 lakh crore nungi 2025-26 nung Rs 7.24 lakh crore aküm aser iba ya küm pezü tsüngda 75% teimba akümba lir. Iba ajanga nisung aikati Himanta Biswa Sarma lenisüba nung tenük asünger. Assam nung tesüba küm 20 tsüngda election agia aruba meyipa reprangdangra nübertemi sorkar melentsü mulungtetba ajiteter. Sorkar anema onük tajungtem lira aser opposition lenir tashitait lira Assam nung sorkar melena aruogo. Tarun Gogoi-i küm 15 tashi Chief Minister inyaka aru saka nisungtemi Modi lenisüba kübok teimla tulu yur pa melen. Assam nung nübertemi Sarbananda Sonowal sülen Himanta Biswa Sarma ya tashitait lenir ka ama züngshir. Taküm election tonga arudang Assam state cabinet-i süngolu nung mapa inyakerkem anogoshi taa Rs 30 agi teimba kümtsüogo aser iba ya taküm April 1 nungi mapa tenzüktsü. Assam nung tea estates 850 jungnüa nung organised tea workers lakh 10 tema lir aser iba telemtetba ajanga sorkar ajanzüktsü imlar. Maneni, Bharatiya Janata Party (BJP)-isa Jan Ashirwad Yatra ta ser teküpoktiba jenjang nungi nüboyimba maparen inyaktsü tenzükogo. Iba campaign ajanga district balala nung voter lakh aika den indangindanga sendakteptsü nükjidong lir. Chief Minister Sarma-isa NDA nem kümsük tasemben atema sorkar akümtsü takok ngudaktsüra küm pungu tsüngda ali bigha lakh pungu tashi meyipa agitsü ta nangzükogo. Tang tashi nung ali bigha lakh 1.5 shi meyipa agiogo aser Assam ajungalen ali bigha lakh 40 shi atsünga agia alir ta pai ashir. Külén, Assam nung opposition tongtiba Congress-i BJP den tokteptsü atema asalentong ano tembanga merenem lir aser constituency aika nung Raijor Dal den olemtepa arudar. Tawa New Delhi nung senden ka amendang Gaurav Gogoi aser Debabrata Saikia nati Asom Jatiya Parishad, APHLC aser Left party tem den jembishinü junga süa arudar ta metetdakja liasü. Telok balala lemsar metokteptsü aser BJP anema votes angutsü atema jembidar ta tenati ashi saka iba asoshi tatembang telemtetba ka magi lir. AIUDF tanishir Badruddin Ajmal-ia opposition longjemmer BJP madak takok angutsü atema Congress den olemteptsü renema lir ta ashir. Ajisüaka Congress-i iba mera magira AIUDF-i election nung kija dang tokteptsü ta Ajmal-isa metetdaksüogo. Item onüktem ajanga Assam opposition longjema maliba sayur aser nübertemi sorkar melennüaka opposition tashi meitra aser opposition lenir tajung ka melira sorkar memelentet. Anungji tang tashi nung Assam nung yimtenren tensaji asadanga reprangra taruba sorkar kümsük nung Himanta Biswa Sarma-isa maneni Chief Minister inyaka aotsü ama repranger.

## OLEMSABANG

### ASANGSANG NUNG MR. DONALD TRUMP YA SHIBA?

~ Mr. Takolong, Chuchuyimpang

Mr. Donald Trump taküm otsü nungi tanü asenok Red Planet Mar's Era nung alirtemi talisa alima chubatem, aser Yisu dak amangertemi tali aroka shisadanga Yisu Khristaji shiba ta mettetsü asoshi iba ocet ya zülutsü tenzükter. Mr. Trump ya asangsang nung Pai Isaiah 45:5 nung Yisu-i shia aliba ama, "Kü dak alima tangar Tsüngremtem mali"anungji Mr. Donald Trump-i Yisui ashiba ama Yisu dak alima tangar, Tsüngremtem mali ta pai bendanga Yisu dak amanger, aser mapa tajung inyaka nebur matak yimsü asür. 2016. küm America President Election nung pai takok mangutsü ta America nung jembiba dang masü, saka alima country 193 ajak nungi pa matoktsü ta jembi, saka Tsüngrem pa den liasü, anungji America lima Yisu dak amanger ajaki pa nem vote agutsü aser pa atok. Ano tsü akhümj lenden nungi perangpong aser injang nungi kümzülka 2024 küm pa tanaben atoka yimsü süa arur. PA kanga dang takar liasü, pa asangwa mapang yi kanga jema liasü, saka pai yi toktsü, kechiba süra takar süaka yi lark a ta nisungtemi ashibaji pai makinü, kechiaser yi majemer nisung tajung takar ka ta nisungtemi jembiba jiang tuluba ta pai angatet.tanü tia tajung asenok ajak Mar's Era putu nung alirtem asü nung putu den apet iba ocet ya lemsatebtsü tenzükter. Tanü na ser ni minister jenjang nung liaka, mesura kanga dang temaba jenjang nung liaka, kadang Prime minister ka den metemdangtir ana jenjangji yimtsüng ka nung Village Council Chairman ka ama dang lir, sürabangla tanü na ser ni Tsüngrem taochi aki manger mesangwa nung tulur ka akum nung Donald Trump ama masü kechiba yi ajemtsü tenzükter? Rev olutionary Artist Bob Marley kanga takar manger mesangwa nung kera millionaire takar ka aküm, saka pa rongsen ajak intokma, cancer tashidak anepptsü merangdang, saka makok, süra tanü ana kechi aka? Tanü ni aser na Nagaland for Christ ta ayimtena Aruogo mesüra lokti balala-l ana nem ita sen tenük sünga agutsür Tsüngrem O ji kotak tenyar amai jembia asenoki jajaka Mr. Donald Trump ama Tsüngremi asenok meteta melira P ama asenokbo injang nungi kümzüktsü lemanng malitsü. Anungji Tsüngrem tsüngdanbg asenok ajak saksalema melira Yona tia dangbo asenok tamajung asutsü. Tanü asenok joko tamalen ita putu nung aliba amato masü saka Mar's putu nung alir asününg putu den apet Tsüngrem O ashgidang yimtsünmg, Ao Lima, Naga Lima, India Lima, etc. majungba mejembli kechiaser alima yabo temenen lima ka lir, ya kotak masü.

Noa-er kibongi tangar majungba mejembi. Noaer kibong Tzüsem yipru nungi kümzükba ama asen taküm, kibong, temenen tzüsem yipru nungi makamait tzüsem yipru nungi kümzükba alitsü asohi Donald Trump taüm ama Tsüngrem tama südaktsür lidi ni ta iba ocet atemer.

Kuknalim

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

## Pakistan nung Khristanpuri yimjung asoshi sarasademtsü



Church of Pakistan indang moderator Archbishop Azad Marshall-i (achichilen nungi pezü buba) March 1 nü 'Day of Prayer for Peace' anir agidang tangokba noksa ka yangi angur.

**Islamabad, Metsüremi/ March 03 (Agencies):** US-Israel lungjemer tayimtsü amshia amakdang Iran indang Supreme Leader Ayatollah Ali Khamenei tepsetba sülen US anema longkak aitba mapang Pakistan Khristanpuri linük tesem ajunga nung "Day of Prayer for Peace" ayongzüka liasü.

March 1 nü nungi tenzüka Karachi yimti nung aliba US Consulate telungi aitsü meranga police aser longkak aiter tsüngta raratepba nung nisung 25 takum samaogo aser 73 yirua lir.

Pakistan yimtiba Islamabad aser Lahore nunga longkak aitba osang lir, aser ketdangsürtemi talisa US embassy temeket nung sepai tali yoka security checkpoints tesashiba kumdaktsüogo.

Protestant telungjem tentet, Church of Pakistan indang moderator Archbishop Azad Marshall-i linük tesem ajunga nung aliba Khristanpurtem dang yimjung, telungjem aser linük aser defense forces den dena lir ta temaitsü Deobarnü sentong agidang temo milen tsükloktüsü ajungshia liasü.

"Prince of Peace sülen anidaker asünungji, linük ajunga nung Khristanpur aser nüburtedang alima nungi azüdokshi aser tashiyim amshiba samadaktsütsü asoshi külemi inyaktüsü aser talisa Middle East nung tensa tajungba kumdaktsütsü atema sarasademtsü ayongzüker," ta pai ashi.

Karachi nung sarasademtsü adenshia alidak, ibai tayang kepzüktüsü mapang masü saka tesüiba temenen bilemtetsü mapang lir, ta Father Tariq George-i ashi.

"Khristan temi yimjung ya temulungjang nungi tenzüker ta asenoki amanger. Asenok Pakistan den lir aser shisatsü tajung agi ain adokba madak takok angutsü sarasademer," ta Catholic putiri UCA News dang ashi.

Khristanpur lenir Luke Victor-ia region nung azüdokshiba ajanga Muslim

nunger kisung masü saka yimsü ajak indang nüburtedak kongshir ta ashi.

"Iran nung Muslim nunger kisung tepseter masü ta metettsü tongtipang. Yangji Khristanpura lir, yangi danga yimsü sülen anidakba nüburtedang lir," ta pai ashi.

"Ibai tamangba yimsü atema masü... Pope aser Anglican bishops tem densema asen lenirtemi jangja-jangja shiogo - tesem mashi nung tepsetba tangsa anentsüla. Asenoki itemji aitsür," ta Victor-i ashi.

Iba ama mepetmesü agi sünger aliba mapang Pakistan nung Khristanpur asoshi khuret süa bilemtetsü, ta pai ashi.

"Onoki police aser tapet institutions den osang agiteptar, kechiaser, taoba mapang iba yimya nung longkak aidang tia

maka Khristanpur dak tenük yok. Onoki ketdangsürtem dang tamangertem kumzüka ayutsü ajungshir."

Kasa mapang Tir Asif Ali Zaradri-i Hindu nunger dang Pakistan anüolen Afghanistan den arütsülen aser region nung tensa mejungi aliba mechi taküm Holi benjong ya tongmelang agi amungtsü ayongzüko.

Pakistan Hindu Council indang patron-in-chief Ramesh Kumar Vankwani-ia Tiri ayongzüka ya shidak lir ta shia liasü.

Pakistan nung Hindu nunger aser Khristanpur ya kin tila lir, kong nütsung yongsük 180 million aliba nungi shilem 95 dak tema Muslim nunger lir. Hindu nunger timba Sindh province nung alir aser Khristanpur timba Punjab province nung alir.

## ANOGO ABEN TSÜNGREM DEN

### Tsüngremer tenangzükbatem au ta lir

Kechiaser Tsüngrem tenangzükbatem kwisüsa lidir ajak Khrista nung au ta lir. Anungji dang Tsüngrem sentsüwangshi atema onoki Khrista ajanga Amen ta ashir. 2 Korint 1:20

Tsüngremi Pa tenangzükbatem ajak ayur. Kodang asenoki Khrista den telungjem nung jajadir, Laishiba nung Tsüngremi nangzüka aliba ajak asenok den lir ta asenoki tejangja metet. Asenok taküm asoshi nangzüka akaba Laishiba nung bushitsü aser tenangzüka shiaji shisadangtsü asoshi Lai azüngtsü iba ochi yagi asenok ajungshidaktsütsüla.

Nenoki ni mulungba langka asüngdangra, nenoki kechi asüngdang aji ni agütsütsü ta Yisui nangzüka (Yn. 16:23b). Iba tenangzüka Khristan shia dang nangzüka. Nai Tsüngrem dang asüngdang iba tenangzüka ne taküm nung amshira Pa telangzübaji majangshira, iba jagi Tsüngremi ashiba memelenshir. Iba tenangzüka kechiba ne taküm nung mataloker ta nai Tsüngremer telangzüba bushitsü akok.

Pauli tenangzükbatemji pa taküm nung tendangogo aser tenangzüka ajakji kanga ochi ta pai kuli agütsü. Iba jagi pai Tsüngrem taochi talubusa Khrista nung asenok tsütsü takar aliba (Ef. 3:7) aser mejembitetba Khrista rongsen indang pai jemi (Ef. 38). Pauli Tsüngremer tenangzükbatem rongsen ngutet aser iba nung talubusa pelaa ali.

Ne taküm nung Tsüngrem tenangzükbatem ajunga matalokaka tasü meiti mesüra tatasa makai teli. Iba ochi tuluba renema akaba agizüktsü asoshi Tsüngremi ne taküm renemdaktsüner asütsü akok. Na Kibuba anasa jajaang, mapang nung ne taküm nung Pa tenangzüka nung süngjang atangba nai angutsü.

## Kidang Yisu noksa aliba agi tamangba yimsü melenba kuli magütsür: BHC



**Nagpur, Metsüremi/March 03 (Agencies):** Ki ka nung Kangki noksa mesüra Yisu Khrista kerakyanglu aliba ajanga yangji alirtem Khristan yimsü dangi meyipogo aser parnok indang Hindu caste yutsüogo ta kuli mesayur, ta Maharashtra state nung tematiba court-i obendang agütsü.

Bombay High Court indang Nagpur bench ajanga February 26 nü obendang agütsüba ya February 27 nü temai adok, kong Khristan yimsü dangi meyipba bhukumtsü atema baptiba indang kuli mesüra baptiba kulizüng kakat alitsüla ta ashi.

Stavan Wilson Sathe ya tetsü-tebou nungeri Khristan

yimsü agizük ta tai tonglokja Akola District ketdangsürtemi pa Dalit nunger masü ta sangdongba sülen pai petition ka benokba nung obendang ya Justices M. S. Jawalkar aser Nandesh S. Deshpande nati agüja liasü.

Iba court yagi district ketdangsürtem telemtetba magizük aser ibai ki telung nung tamangba yimsü noksa aser school records tejen kisung nung ajemdaker lir ta ashi. Court-i ketdangsürtem dang ita ana tsüngta Sathe nem Dalit caste certificate agütsü totuyuba agüja liasü.

Dalit nunger Khristanpur ya taoba mapangbo Hindu nunger loktiliba nung "untouchable" ama amshia liasü, aser parnok ya Khristanpur mesüra Muslim nunger asüba yong parnok ya Dalit nunger ta kuli sayutsü atema kulizüng kakat magütsü.

Kaket reju aser sorkar mapa nung quotas densema India nung inyakyim balala

nungi teyari agitsü atema iba amala kulizüng kakat ka kanga tongtipang lir.

2023 küm September ita Sathe-i 1932 aser 1934 mapang amshiba documents bener arua yangji tebou indang caste ya Mang (Dalit subcaste) ta kuli sayuaka district ketdangsürtemi pa Dalit caste masü ta ashi.

District ketdangsürtemi magizükba ya 1962 document ka nung "Khristan" ta inoka aliba kisung ajanga lir, ta Sathe indang okatsüri court nung ashi. Caste nung ajemdaker school nung merenshia amshiba tia majurutsü atema Sathe tebou-i khen atema Khristan maitsü amshi saka tamangba yimsü melenba kodanga meliasü, ta okatsüri ashi.

Iba kuli bhukuma parnoki school records, sorkar indang documents aser kinunger indang tang tamshidak caste kulizüng kakat tem sayua liasü.

"Temeshi Kangki indang noksa mesüra Yisu Khrista indang kerakyanglu aliba kisung agi petitioner tetsü-tebou nunger Khristan yimsü

dangi meyip ta kuli teperi magütsür," ta court-i ashi.

Osangbener aser All India Catholic Union indang odongtar John Dayal-i ashiba agi, rosary inokba aser kidang Laishiba ka ayuba ajanga ozüng nung aibelen masü mesüra nisung mashi ka Khristan makumer, kasaji Hindu mesüra Islamic maitsü aliba calendar ajanga nisung ka yimsü balaka dangi memeyiptsü.

Tamangba yimsü melenba asoshi ozüng kübok teinyaktsü kar lir aser nisungbai pa iba yimsü amanger ta nangzüksüla, ta Dayal-i osangbener dang ashi.

"Anti-conversion laws aliba densema states kar nung tamangba yimsü melenba ya magistrate mesüra iba mesük ketdangsür matsüngdang inyaktüsüla," ta pai ashi.

Catholi lawyer aser Watchdog Foundation indang founder-trustee, Godfrey Pimenta-ia, temulung melemtetba kisung ajanga caste jenjang magütsüba ya tim masü ta court totuyuba nung sayur, ta ashi.

AO OSHI ANGAZÜKDAK:

TANÜ ANGAZÜKTSÜBA OJANG



Ululok

(v) tuluba küma inyak ( made to increase)

\* Tamanger aika akümba agi tenla ki ululok.

Ulunüba

(n) peisasa tulu kümnüba ( over ambition)

\* Nisung dak ulunüba shisatsü aliba agi peisasa raksar.

OLONG PAITEP # 7432

16x16 crossword grid with numbers 1-16 indicating starting positions.

TIPIEN

- 1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

- 1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7431 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut, 9. Ajizük, 10. Ojala, 11. Semer, 13. Sen, 15. Kioksü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua, 5. Mitsüktsü, 6. Azübenshi, 8. Lah, 9. Jangkok, 12. Akok, 14. Nashi, 16. Sür.

NAI-A YA METETTER



US nung Aldie, Virginia nungi arishi küm 37 tain kor 'Fancy' ajanga "World's Oldest Living Horse" naroküm nguogo.

Fancy ya April 1, 1988 nü aso aser tesüba küm 30 tashi la kibur Paige Sigmon Bloomer den lia arur ta Guinness World Records-i metetdaksü.

Paige'er tsüraburtemi Fancy arishi küm 8 asüdang alizük aser Paige o Fancy naprong tasoba anogotem kasa lir.

Fancy arishi küm 37 ser anogo 329 ajungdang Paige-i Guinness World Records nung la tenüng züluoktsü atema agüja liasü.

Arunachal CM-i Girijapati Shiv Mandir nung aden

Itanagar, March 3, 2026 (Agencies): Arunachal Pradesh Chief Minister Pema Khandu Girijapati Shiv Mandir nung Shree Ram Darbar aser Nav Durga Pran Pratishtha sentong nung denogo.

"Vishva Hindu Parishad nung International President Alok Kumar, BJP State President Kaling Moyong, MLA tem aser tangar den külemi iba sentong nung adenba ya temoatsü ka aser tetushi lir" ta CM Khandu-i ashi.

Iba sentong nung Shree Ram Darbar, Nav Durga aser Bajrangbali sayaa liasü. Pandits aser pujaris ajanga Pran Pratishtha külemküja ketdangsüa agi.

Chief Minister Khandu-isa Girijapati Shiva Linga aser Swyambhu Shiva Linga nung sarasadem aser Bhagwan Shri Ram, Maa Durga o Mahadev nungi temoatsü meshi.

Iba sentong ya "Jai Shri Ram" aser "Har Har Mahadev" ayimtena tembang.

OFFICE OF THE LONGJANG LONGKUMER KIDONG TELUNGJEM MOKOKCHUNG : NAGALAND

TENÜNGSANG AGÜTSÜR



Miss. Sashimongla I. Longkumer



Mr. Talikaba Longkumer

- 1. NBSE kübok 2025 küm Science aser Mathematics (Class 8) nung marks timtiba ngutetba asoshi Kr. Sashimongla I Longkumer, Mr & Mrs Imti Longkumer jala nem Girl Child Award agütsüba atema Longjang Longkumer kidong-i tenüngsang agütsür.
2. Maneni Guwahati nung 15th Gatsby Mega Mister North East 2026 alidang Nagaland nungi Sp. Talikaba Longkumer, Mr & Mrs Warningsang Longkumer jabaso-i tajungtiba nung shilem agia iba tetoktepba takok korang ngutetba atema kidong-i tenüngsang agütsür.

Sd/-

Mr. Nungsangmanen Longkumer, President.

Tata Semiconductor ketdangsürtemi 'food baskets' agütsü

Guwahati, March 3, 2026 (Agencies): Assam kübok Morigaon district nung tuberculosis (TB) agi shiranger nem nutritious food baskets lema agütsüogo.

Tata Semiconductor Project ketdangsürtemi March 2, 2026 nü Nikshay Mitra kübok iba mapa inyak.

Jagiroad nung PWD Inspection Building nung iba sentong agi aser iba den külemi TB-Free India campaign atema senden ka amen. Iba sentong ya District Administration-i Morigaon District Health Society teyari agia ayongzük.

District Commissioner Anamika Tewari den Tata Semiconductor Project ketdangsürtemi shiranger nem nutritious food kits lema agütsü.

"Tata Semiconductor Project ketdangsürtemi iba mapa tajung inyakba asoshi tenüngsang agütsür. Semiconductor project nung production ano metenzük saka TB agi shirangertem yariba ajanga lokti asoshi inyakba tenangzükba sayur" ta DC Tewari-i ashi.

Morigaon nung iba ama mapatong tenzükba ya konang aser tia tajung mapa ka lir aser tarutsü nunga lokti asoshi mapa balala inyaka aotsü imlar ta lai ashi.

"Nübertemi TB agi shirangertem senzüka meyutsüsüla mesüra bendanga mashitsüla. Parnok-a loktiliba nung tongti züngsemtem ama züngshitsüla aser bendanga metoktsüi temeim sayutsüla, aria bilemtsüla aser yaritsüla" ta

DC Anamika Tewari-isa ayongzük.

Iba sentong nung o jembirtemi Morigaon district TB-free kümdaktsütsü atema külemi yariteptsü nenshia liasü.

District TB Officer Dr Amarjyoti Deka-ia nübertem dang TB agi shirangertem mulungsoa yaritsü aser Nikshay Mitras ama parnoki tashidak den rara nung yariteptsü mepishia metetdaksü.

Iba sentong nung Additional District Commissioner (Health) Joint Director, Tata Semiconductor Project ketdangsürtem, Jhargaon nung Sub-Divisional Medical & Health Officer aser District TB Office nungi doctor o ketdangsürtem aden.

Guwahati nung Khasi film 'Ha Lyngkha Bneng' film sayu

Guwahati, March 3, 2026 (Agencies): Hello Meghalaya ajanga nungitba Khasi film kati international prizes aika anguba sülen Guwahati film festival ka nung sayuogo.

Guwahati nung Kelvin Gold Cinema nung Pradip Kurbah-i direct asüba Ha Lyngkha Bneng sayu.

Iba sentong nung filmmakers aser sobalibaren dak sendakba nisungtem aden aser Meghalaya

nung OTT platform Hello Meghalaya ajanga yariba film reprangogo.

Kurbah-i yangluba film ya rural Meghalaya nung nisung trok indang otsü lir. Khasi tangatetba nungi parnok taginübatem, tesentaktep aser temelenshitem indang otsü ashir.

Ha Lyngkha Bneng film ajanga 2025 küm tatemlen sempet aika nguteta liasü aser

iba sülen Guwahati nung ayongba sentong nunga sayuogo.

Yaküm November ita 31st Kolkata International Film Festival nunga Ha Lyngkha Bneng film ajanga Golden St George aser tanga sempettem agizüka liasü.

Iba sülen Moscow International Film Festival nung NETPAC Award for Best Asian Film sempet angu.

Indian Army nung Spearhead Gunners-i anir artillery exercise agi

Guwahati, March 3, 2026 (Agencies): Indian Army nung Spearhead Gunners-i Assam kübok Darranga nung Indo-Tibetan Border Police, Assam Rifles aser Army Aviation den joint artillery firing exercise tulu ka agiogo.

Iba joint drill nung advanced surveillance systems, reconnaissance flights aser

coordinated firepower deployment amshia liasü.

Infantry, ITBP aser Assam Rifles külemi yaritepa accurate artillery engagement nung shilem tajung agia liasü ta ketdangsürtemi ashi.

Army Aviation-i shilem agiba ajanga aerial reconnaissance aser surveillance capabilities

tashi itdaksü ta ketdangsürtemisa ashi.

Iba exercise nunga Arunachal Scouts dena specialized units tashi itdaksüogo aser arrtsülen mapa lemezüka aliba Army aser paramilitary forces külemi inyaksangshitsü tesentaktep akangshiogo ta ketdangsürtemi metetdaksü.

**POTENTIA RESIDENTIAL**  
"Exclusively For NEET Aspirants"

**NEET 2026 CRASH COURSE**      **Classes start from 6<sup>th</sup> March 2026**

- \* COMPLETE REVISION - PHYSICS, CHEMISTRY & BIOLOGY
- \* MOCK TESTS & EXAM-FOCUSED PRACTICE
- \* EXPERT FACULTY & PERSONAL MENTORING
- \* PEACEFUL RESIDENTIAL STUDY ENVIRONMENT

**ADMISSION OPEN**

17th years of Consistent Neet Result

9862032828      Khadiruzha Ward 1  
7005657885      Chumoukiedima

OFFICE OF THE  
**AKHOYA STUDENTS' UNION MOKOKCHUNG UNIT**

**TENÜNGSANG AGÜTSÜR**

Akhoya Kaketshir  
telongjem ajanga  
Wb.Aonungsang jamir aser  
Wt. Imramokla Lkr na Jala  
**Kr.Nukshikala Jamir-i**  
ASMITA kickboxing zonal  
league Low kick - 70kg  
category nung gold medal  
Jenang tashi takok ngütetba  
asoshi Tenungsang agütsür.  
Tsüngremi nü taküm aser nü  
wadang maneni mojangma.



**Sd/-**  
**Imtijungla, President**  
Akhoya Students Union  
Mokokchung Unit

**Sd/-**  
**Sungjemnungla, G/Secretary**  
Akhoya Students Union  
Mokokchung Unit

GOVERNMENT OF NAGALAND  
**DIRECTORATE OF TECHNICAL EDUCATION**  
KOHIMA: NAGALAND  
**NOTIFICATION**

NO.DTE/SCTE/6/2023-24 : Interested Candidate are hereby informed to fill up the Prescribed Application Form to undergo 3 (three) years Diploma Courses in State run Polytechnics for the academic session 2026-27 w.e.f.5th March till 31st March 2026 which will be issued from the office of the undersigned as well as Government Polytechnics during office hours on all working days. Candidates who have appeared HSLC/HSSLC final examination of 2026 are eligible to apply for the Diploma Selection. However, they will have to submit necessary documents within stipulated time period and fulfill all criteria for selection to study Diploma Programme.

Application Form & Prospectus 2026 may also be downloaded from the website <https://dte.nagaland.gov.in>, in which case the fee of Rs. 200/- (Rupees Two hundred) only may be deposited while submitting the Form.

**Programmes offered in the Polytechnics.**

Sl. No.	Name of Polytechnic	Program Offered	No. of Seats	Minimum Qualification
a	b	c	d	e
1	Khelhoshe Polytechnic, Atoizu (KPA)	Civil Engineering	60	HSLC/10+ passed in Maths & Science
		Mechanical Engineering	30	
		Electrical & Electronics Engineering	30	
		Automobile Engineering	30	
2	Institute of Communication & Information Technology (ICIT), Mokokchung	Computer Science & Engineering	15	
		Electronics & Communication Engineering	8	
3	Government Polytechnic, Seithekema 'C' Chumoukedima	Civil Engineering	40	
4	Government Polytechnic, Sedem, Tuensang	Civil Engineering	30	
5	Government Polytechnic, Tsunazho, Chetheba, Phek	Electrical & Electronics Engineering	30	
6	Government Polytechnic, Aboi, Mon	Civil Engineering	30	
7	Government Polytechnic, Kohima (GPK)	Civil Engineering	30	
		Computer Science & Engineering	30	
		Fashion Technology	30	
8	Government Polytechnic, Doyang, Wokha	Architecture Assistantship	15	HSLC/10+ passed with Maths & Science
9	Government Polytechnic, Peren	Interior Design	15	
10	Nagaland Tool Room & Training Centre, (NTTC) Dimapur	Mechanical Engineering	60	HSLC/10+ passed in Maths & Science
		Computer Science & Engineering	30	

**(ER. VIPULHOU LHOUNGU)**  
Director

**URGENT SALE**  
Plot of land, Fishery and Paddy Field



Total Area : 11.12 Acres      LOCATION : PIMLA VILLAGE CHUMOUKEDIMA  
Total Size : 484,470 sq. ft.  
Rate : ₹ 45 per sq. ft. (Surrounding rates are ₹ 60-100 per sq. ft.)  
Total price : ₹ 2,18,00,000 ( ₹ 2.18 Crores)  
Price Negotiable      Contact : 8974933493

**ALIAYOKTSÜ LIR**

Aoyim anasa Seitheke Basa nung.  
Talinür lira 8415081855 nung  
contact süangma

## Rara tuluba akumer, Iran-i Saudi Arabia nung US Embassy amak

**Dubai, Metsüremi/March 03**  
(Agencies): Mongulbarnü Iran-i par targets ulushia Saudi Arabia nung US Embassy amak, aser Washington-i Middle East nungi staff aika anizüker aor. US aser Israel nati Iran nung tayimtsü amshia amaker, koba Tir Donald Trump-ibo rara ka tenzükbanga dang lir ta ashir saka alima rangben nung totzü aser gas supply, rong aser tayimtsü tashi kanga sashia kongshir lir.

Rara tenzüker pezünü buba nung tesashiba kuma Israel-i Lebanon telungi sepaitem yok aser Iran yimtiba nung ola tulu adoka apokba liasü. Nisung noklang aika tepsetogo, aser timba Iran nung lir.

Tesem balalai iba rara pokloka aoba ajanga kodang aser koma iba rara tembangtsü ta tasingdangba arur. Trump-i iba rara ya hopta pezü nungi pongu tsüngta alitsü, saka iba dang nungi talangba raratsü US renema lir, ta shia lir.

Tang tashi Trump administration indang nükjidong mejangjai lir. US aser Israel-i mezüng amakdang Iran Supreme Leader Ayatollah Ali Khamenei tepset aser Trump-i Iran nung dang par sorkar atsüngdoktsü ajungshia liasü.

Ajisüaka iba sülen US ketdangsur kati yimli melentsüba ya nükjidong masü ta ashi.

Drones ana nungi Riyadh nung US Embassy amakdang mi adok, ta Saudi Arabia indang Defence Ministry ajanga ashi aser embassy-i America nung dang

compound anasai marutsü ashi. Iba sülen Kuwait nung aliba US Embassy amak. Tarutsü nung sangdong ka magütsü tashi shibanga atar, ta Kuwait nung aliba embassy ajanga Mongulbarnü sangdong.

US State Department-i Kuwait, Bahrain, Iraq, Qatar, Jordan aser United Arab Emirates nungi non-emergency personnel aser kibong tem ainshitsü totuyuba agütsüogo. Iba den külemi US-i Middle East linük ter dak tema nungi par nüburtem ainshitsü ajungshir, ajisüaka yangji airspace timba shibanger lir.

US aser Israel-i amakba nung nisung 787 tepsetogo, ta Iranian Red Crescent Society-i ashir. Israel nunga tesem kar nung Iranian missiles khaloktsü aser nisung 11 tepset. Iran-i yariba Hezbollah telungpuria Israel dak amak aser parnoki meyiper tayang kepzüka Lebanon nung amakdang nisung 52 tepset.

US mitkari American service members trok asüba jangjaogo. Iba den United Arab Emirates nung nisung asem tepset, Kuwait aser Bahrain nunga nisung ka-ka tepset.

Iran-i Mideast nung UAE, Bahrain, Qatar aser Saudi Arabia nung tesem balala amak aser Strait of Hormuz nunga rong kar maka liasü.

Iraniang Brig. Gen. Ebrahim Jabbari-i Strait of Hormuz shibangogo ta sangdong aser iba Strait ajanga süyiba rong ajak amaktsü nangzüka lir.

## Afghanistan nung civilian 42 tepsetogo: UNAMA

**Kabul, Metsüremi/March 3** (Agencies): February 26 nungi March 2 tsüngda Pakistan den rara nung Afghanistan nung civilian 42 süogo aser 104 yiruogo, ta United Nations Assistance Mission in Afghanistan (UNAMA)-i Mongolbarnü metetdaksü. Kidanger linük ana rara tenzüker anogo trokbuba ajungba mapang iba osang metetdakja liasü

Mongolbarnüa tensa kanga mejungi liasü aser Afghanistan-i ashiba agi, parnoki Kandahar tesem nung pakistan indang post ka atsüogogo.

"Civilian asübatem rongnung kar anüng ajanga amakba mapang asüba aser kar injang agi mesüaka raradak sendakba lendong nung asüba densema lir," ta UN agency yagi ashi.

Afghanistan nung Taliban nungi yimsüsürtemi ashiba agi, Pakistan-i Afghanistan nung telungpurtem tamendakdak amakba sülen parnokia meyiper telangzüba agüja iba rara ya tenzükgogo, koba linük ana tsüngda kümtem tsüngda rara tesashitiba lir.

Afghanistan-i ashiba agi, Pakistan nung sepaitemi civilian tem dak rangloker jenjang agir, koba Islamaba-i magüzüki arudar.

Islamabad-i hopta tsüngda Taliban military tamendakdak balala air-to-ground missile tem amshia maka arudar aser tang mezüngbuba Taliban sorkar dak rangloker jenjang agiogo. Afghanistan-i Pakistan amaktsü atema kiralongrartem nem tejenokdak agütsür ta shia Pakistan-i Afghanistan aija arudar.

Pakistan nung sepaitemi

Afghanistan kübok Nangarhar province nung military base ka makogo, ta Pakistan security source kati Mongolbarnü metetdaksü.

Linük anapronglai parnoki tsükchir aika tepsetogo aser military facility tem aika raksatsüogo, ta shia arudar.

Pakistan Tir Asif Ali Zardari-i Hombarnü parliament nung ashiba agi, Islamabad-i kidanger linüktem ya onok amaktsü atema mamshidaktsütsü.

UNAMA-i rara anentsü ayongzükgogo aser rara ajanga Afghanistan nung kibong 16,400 shi pei talidak ki toktsür aotsüsa kümer alirtem timtem tekangshi tamajungba kümogo, kechiyong parnok August aser September ita menoknok anokba ajanga timtem tekangshi bener arutsüba ano mesüngjemi liasü, ta ashi.

## Norris, Littler aser Leah nungger Laureus awards atema nominate süogo



Lando Norris



Luke Littler



Leah Williamson

**Metsüremi/March 3, 2026 (Agencies):** Lando Norris, Luke Littler aser England tetsür football team nungger taküm Laureus World Sports Awards atema nominate süogo.

2025 Formula 1 driver's title abenba sülen Norris ya Breakthrough of the Year category nung nominate süa lir.

Pa iba naroküm atema Littler den tokteptsü, shibai darts' asaya nung world championship, Premier League aser World Matchplay title bena liasü.

England tetsür football team-i European Championship akokba sülen parnok ya European Ryder Cup golf team den Team of the Year award atema shimogo.

Takoker ya Madrid nung April 20 nü sentong ka agiba mapang sangdongtsü.

Leah Williamson, shibai England team Euro asaya nung

aser Arsenal pur Champions League takok dangi ania liasü, la Comeback of the Year category atema shimogo. La anterior cruciate ligament yiruba nungi meyipa arur kanga takok ngua asayaogo.

Iba category nung Rory McIlroy aser Simon Yates nata nominate süogo. Cyclist Tom Pidcock shiba taoba küm Action Sportsman of the Year atema nominate süa liasü pa taküm iba category atema shimogo.

Pole vaulter Armand Duplantis shiba taoba küm Sportsman of the Year naroküm agizükogo, pa taküma iba category atema nominate süogo.

Ballon d'Or koker alisang Ousmane Dembele, tennis asayar Carlos Alcaraz aser Jannik Sinner nungera Sportsman of the Year naroküm atema nominate süogo.

Barcelona tetsür team midfielder Aitana Bonmati

taküma Sportswoman of the Year category atema shimogo. La iba naroküm atema tennis asayar Aryna Sabalenka aser 800m o 1500m freestyle world champion swimmer Katie Ledecky nungger den tokteptsü. Iba telok nung 100m, 200m and 4x100m relay koker alila Melissa Jefferson, 1,500m gold medallist Faith Kipyegon aser 400m winner Sydney McLaughlin-Levrone nungera densema lir.

Sportsperson of the Year with a Disability award atema asayar trok shimogo, kong David Kratochvil densema lir, shibai World Para Swimming Championships nung gold medal pezü ngua liasü.

Pa den tziüwarsa Gabriel Araujo aser Simone Barlaam na aser Para-athlete Catherine Debrunner aser ice hockey asayar Kelsey DiClaudio nungger densema lir.

## PCB-i Pakistan nungger asayartem dang senchi achitsü

**Metsüremi/March 3, 2026 (Agencies):** Pakistan team-i tang asaya aliba T20 World Cup nung junga masayateti tsukatokba sülen Pakistan Cricket Board (PCB)-i telemtetba khenyongi balaka agia asayartem dang senchi achitsü telemtetba agiogo.

ICC T20 World Cup nung Pakistan team semifinal metongteti kanga kara tsukatokba sülen PCB-i asayartem dang senchi achitsü telemtetba agiogo.

Ali Agha-i aniba Pakistan team ya Super 8 stage nung tsükogo. Tatembangbuba asaya nung parnoki Sri Lanka bo akok saka net run rate nung parnok New Zealand jakdang tembanga semifinal-i aitsüsa masayatet. Parnoki iba asaya nung SL nem run 147 tekübok yangludaktsütsü nungdaka liasü. Tang agi ICC asayamung pezübuba nung Pakistan team

semifinal metongteti tsükogo.

Inyakyim melenshitsü melena PCB-i asayar shia dang PKR lakh 50 senchi chiogo. Express Tribune sangdong ka ajanga ashiba agi, Pakistan team asayamung nungi tsükba sülen iba telemtetba agi, saka group stage nung February 15 nü India makokba sülen iba jenjang ya agiatoker liasü.

Board-isa, tarutsü nung asayartem asayaba yimya dak ajemdaker senotsü tajangzüktem agütsütsü asoshi telemtetba agiogo, ta kasa sangdong ajanga metedaktsü. Team ya asaya ajak Sri Lanka nung asaya kong conditions parnok asoshi tapet liasü.

"Ketdangsurtemi taoba mapang asayartem dang ojang dang medemshia amshitsü ta shiogo aser tang nungibo senotsü ya asayaba yimya dak ajemdaker agütsütsü," ta osang

ajangsa metetdaktsü.

Ken o dak sendakba nung PCB-i tang tashi nung official osang ka agüja mali.

Pakistan-i group stage nung Namibia koka Super 8-i ai. New Zealand den mezüngbuba Super 8 asaya ya tziunglu aruba ajanga masayatet. England makokba sülen parnok semifinal-i aitsü maitsüji tanga team asaya result dak metaloker liasü. England-i New Zealand akokba ajanga Pakistan nem timla agütsü, saka parnoki Sri Lanka tera agi dang akokba ajanga parnok net run rate mejungi aküm.

Asayamung nungi tsükba sülen taoba captain Babar Azam, tang skipper Salman Ali Agha, asayar Shadab Khan, Shaheen Shah Afridi aser Mohammad Nawaz nungger ajak kanga mejungi aitsüogo. Agha-ia captain mapa ya toktsütsü imlar.

## AIFF-i Mohun Bagan nem temerenshi agütsü

**Metsüremi/March 3, 2026 (Agencies):** Asaya reprangertemi yimya shitak mebenshiba atema All India Football Federation's (AIFF) disciplinary committee-i Mohun Bagan Super Giant dang senchi achi aser parnok taruba Indian Super League asaya kishi shibanga yur asayatsü tetuyuba agütsüogo.

March 6 nü Kolkata kübok Salt Lake Stadium nung Odisha FC den asayaba mapang iba tetuyuba ya benoka inyaktsü.

February 23 nü Chennaiyir FC goal 2-0 agi akokba asaya nung asayar reprangertemi timtem agütsüba sülen iba tenokdangba ya agütsüogo.

Club-i senchi achiba yabo agizükogo, saka stadium ajunga shibanga yur asayatsü tetuyuba agütsüba yabo ashishio.

X nung sangdong ka ajanga Mohun Bagan-i, "Club-i senchi achiba yabo agizükker, saka March 6 nü Odisha FC den kidang asayatsü aliba asaya stadium ajunga shibanga yur asayatsü tuyuba yabo tera tali lir," ta ashi.

Club-i asayar reprangtsü purtem marudaktsütsü tetuyuba agütsüba ya agintsü mepeshi saka magizük.

"Onok pusemertem atema iba temerenshi yabo tim masü," ta club-isa shisem.

Mohun Bagan-i iba temerenshi agütsüba agi temulung masüba lemsatepogo aser ashiba agi, temzüng ozüng sülen tashi anga anidakba fan meyirejang aika iba ajanga tim mesüi kongshitsü.

"Stadium shibanga ayuba ajanga temzüng ozüng sülen tashi anga anidakba onok pusemertem temi mesüi merenshitsü," ta club-i ashi.

Club-i ashiba agi, fan tem tejangraba apir parnoki iba temepishiba agütsüogo.

"Football ya fan tem meyong. Parnok nem tajungtiba agütsütsü langa lir," ta Mohun Bagan-i ashi.

Iba tenokdangba agütsüba tetezü ISL nung club tulutiba ka asaya tongtibang ka stadium tazüng nung asayatsü, koba teti dangbo mataloker.

## Welbeck-i Brighton den tenangzüktepba yanglushiogo



**Metsüremi/March 3, 2026 (Agencies):** Brighton striker Danny Welbeck-i pa indang contract nung tenangzüktepba ano ita 12 atsülangshitsü yanglur aliba benokba sülen pa iba club nungi taruba season tatem tashi asayatsü.

Arishi küm 35 tain asayar den tenangzüktepba yanglur aliba ya tang asaya aliba season tatemi tembangtsü liasü, saka pa maneni iba club nungi ano season ka asayatsü.

Welbeck-i iba club den 2024 küm küm ana atema tenangzüktepba yanglu, saka iba mapang contract ya ita 12 atsülangtsü asoshi nangzüktepba indang mesangdong.

Pa contract dak sendakba nung Brighton nung Welbeck indang tarutsü mejangjai liasü, saka tang taoba mapang Manchester United aser Arsenal forward ya taruba season-a Seagulls nungisa asayatsü jangjaogo.

Welbeck-i tang asaya aliba season nung kanga junga asayar

arudar aser pa ya club nungi goal timtiba idaktsüba asayar lir. Pai asaya 30 nung goal 11 idaktsür lir. Pai tatemsa Deobarnü Nottingham Forest goal 2-1 agi akokba asaya nung goal idakja liasü.

Pai kanga junga asayaba ajanga pa England team atema shimsü asoshi asadangertem rongnung ka kümogo. England team coach Thomas Tuchel-i November indang qualifiers masaya tsüngda Welbeck squad nung anioktsü atema kanga junga asadanga metetdaktsüogo.

Tuchel-i iba ita tatemlen World Cup atema team meshim tsüngda tatembangbuba squad sangdongtsü.

Brighton manager Fabian Hurlzeler-i, hopta ishika tsüngda Welbeck meyoknuba lemsatepa aruogo.

Welbeck ya 2020 küm Ocotober ita Watford nungi Brighton nung oa aden aser pai iba club nungi asaya 191 nung goal 48 idaktsür lir.

## BILEMDANGANG

"Temeim sayutsü atema maongka alidang sayuang."